

四庫全書

集部

欽定四庫全書

集部

宋百家詩存卷二十四

詳校官監察御史臣孫家賢

主事銜臣徐以坤覆勘

總校官庶吉士臣倉聖脉

校對官中書臣李 奎

謄錄監生臣孫 炯

欽定四庫全書

宋百家詩存卷二十四

嘉善曹庭棟編

玉楮集

岳珂字肅之號倦翁彰德人霖子紹熙壬子甫十齡
隨父帥廣開禧初為鎮江饗幕庾吏乙丑試南宮不
售歸官下與劉過辛棄疾相善時有北伐之役奉檄
不獲辭遂浮漕河而北塗中所作詩題曰北征嘉定
丁卯除守樞李庚午召還中都尋坐誣去官嘉熙初

特詔有為卿直前枉之語除戶侍總饗庭中雙竹岐
生時傳為瑞應歷寶謨閣直學士提舉太平興國宮
以恩封鄴侯王楮詩藁八卷自嘉熙戊戌至庚子凡
三周歲所作手編而自序之後移家樵李金陀坊痛
其祖武穆為秦檜所陷作籲天辨錄諸書總名金陀
粹編

戊戌二月十日京湖袁總郎以堂帖至有詔復
除戶侍總饗

晝長收枕酣春臥剝啄敲門驚夢破雙旗健步衣正黃
爵羅駭見久未嘗泥絮一封片詔香王人繭牘親遣將
老夫五年坐竒謗身則漁樵志猶壯豈無戀闕如子牟
強擬隨裝學張敞浮雲滿空能蔽日雲散天空日華出
千三百載春又春杜陵久矣無斯人黃衣走塵漫跋跋
縱了桴鼓何足云姑言絮舜工負恩堯天舜日定不爾
皎皎太空無點滓當時下書便疑似聊坐和歌焉熱耳
寧比三光覆盆底金羈欲脫還從頭絡頭薺草均一牛

吾身本是報恩具十年萬年屬明主感恩欲慙淚如雨
且願投讒畀豺虎

五年不治筆硯奉詔起家是日始草辭免奏旋
假書吏於郡題寫皆生疎又堂帖趣行三日戒
塗偶成

露封騰奏曉鳴鈴當御應闕乙夜呈京兆有裝隨使者
陳留無酒憶廚兵故營將鉞譚家世老吏公車識姓名
塵事看看到書尺更驚三日有王程

黃鶴謠寄吳季謙侍郎時季謙自德安入城予適以使事在鄂

廬山白鶴歸來雙縞衣素袂玄為裳翅如車輪夜橫江
風聲曾走淮淝羌戛狀長鳴下柴桑芝田啄粒遙相望
何人網羅倏高張上決雲漢旁八荒一隨鵬鷖驚遠翔
低頭不肯謀稻粱一罹置弋沮澤旁局身筠籠翅摧藏
鸚鵡洲畔葭葦鄉水雲蒼蒼江茫茫九皋欲聞聲不揚
回顧鷗鷺羞顏行忽聞緌筌度宮商紅塵俯視有底忙

磯頭刷羽今正黃欲槌此樓呼酒狂

予以謬作數種并總所奏藁遺參贊高紫微聞
以閱讀未及賜報平日正病無人為過目者茲
不特餉所有別白半生漫浪筆硯閒為不虛矣
因贈二首

夜半軍書尚掣鈴想應散枕夢難成新涼頗復欺長夏
舊事何妨閱短檠人說文衡真有託公於詩卷若為評
復襄遺跡今如許試考當時六萬兵

涉筆牛腰倦不支餘工那復到新詩
殷雷袂綠又期月
指日棗紅能幾時
自古兵財無上策
於今社稷寄西陲
入郭及國均危道
勿謂君侯不敢知

拙婦吟

西風策策黃葉舞
茅檐三尺鳴秋雨
東家拙婦擁面號
彊剔孤燈訴愁窶
當年采桑陌上歸
嬉遊不管春蠶飢
千絲萬縷繭白雪
便學紅女攀花枝
七十八事機織
暗鎖青閨人不識
二十三十幽恨長
盧家古梁玉為堂

四五十已老大唧唧鳴蜚欺獨臥尚隨姑嫜作笑瞋
一生苦樂由它人君不見昨朝縣吏踏門闌杼軸已空
盆盎竭雞豚指柵索飲壺掀釜叫嘍啞婦拙起來迎門
陪笑面不似嬌羞怕人見今年歲事苦不登且為當家
聊一展吏罵不甯怒且訶大兒門東窺飯籬藁砧走藏
姑誚罵造餅無麪知如何感金芙蓉戲雙鴛繡牀一倚
曾萬錢低頭長歎祇自憐昔者何巧今不狀吏嘍已倦
里正醉技淚背人還滌器明朝欲酒姑勿譁正恐突隳

驚阿家

春波堂小飲懷棠湖舊隱

平生到處西湖長
眼底波光日日新
圖在輞川非舊隱
夢回笠澤是前身
一江細雨散青蘋
萬里雄風起白蘋
獨立蒼茫動歸興
釣磯須理未垂綸

炎暑今年特地奇
不妨湖上訪清漪
長隄步屨誰堪擬
高閣憑欄我總宜
喚客黃鸝穿柳度
猜人白鳥映荷窺
衰翁病骨難禁熱
且倩西風自在吹

約客春波督參劉郎中方赴高紫微之集道閒
相值不容留戲贈二首

春波堂上倚闌干一曲樓臺掩靄閒野衲再尋行脚債
釣蓑聊寄賞心閑燕低欲舞影翻水鳥倦知還雲在山
匹似棠湖儘堪住遠擔祇欠翠螺鬟

錦帳星郎油壁車紫薇花下醉流霞簫鸞東引瞻風馭
池鳳西遊賦日華蓼岸半紅秋漸老柳隄仍綠約猶賒
一尊更趁萊衣綵河漢還乘八月查

與高紫微雪溪餞客雖已豫盟狀生次予每居
上為之踖踏寄此見意

碧梧正耐雪溪秋況是西風送客舟
華宴雖思奉婪尾
麤官何敢作遨頭
達尊諒識詩囊意
負約仍輸酒斛籌
想見尊前列紅袖
可憐無分聽梁州

秋夕有感二首呈督視參政

湯湯南紀重喉衿縱敵年來患已深
七十萬家財與力
六千里地古猶今
薇屯正自憂無給
桑土當思徹未陰

用力愈勞工愈寡相公試察此時心

老去工夫在一邱解驂重使借前籌憂闕王國漫驕口
事為它人常歷頭蟻穴潰隄猶未計鮒車涸轍若為謀
恩波況是如天濶蚤放棠湖理釣鉤

九江霜螭比他處黑膏凝溢名冠食譜久擬遺
高紫微而家僮後期未至以詩道意不到廬山
孤負目不喫螃螬孤負腹昔人句也

君不見東來海螭誇江陰肌如白玉黃如金又不見西

來湖鱗到沔鄂玉軟金流不堪斫九江九月秋風高霜
前突兀瞻兩螯昆吾欲割不受刀頗有長碧流玄膏平
生尊前厭此味更看康廬拂空翠今年此曹殊未來使
我對酒空悠哉舊傳騷人鍊奇句無鱗無山兩孤負老
來政欠兩眼青那復前籌虛借箸祇今鄉國已駿奔軍
將日高應打門流涎便作麴車夢半席又擬鍾山分先
生家住岷峨脚屢放清遊仍大嚼襟期盡醉何日同試
簞太元呼郭索

以螃蟹寄高紫微踐約侑以雪醅時猶在黃岡
前朝無蟹惟有詩亦復無酒供一瓶今朝有蟹仍有酒
極目征帆更搔首古來樂事誇持螯赤瓊釀髓玄玉膏
菊花吹英好時節況是九日將登高旌旗半江茄鼓發
不作詩人澹生活待君淨洗沙漠塵歸趁看燈更奇絕

蟹至正月重出
俗謂之看燈蟹

聞韓正倫檢正挂冠感歎故交悵狀久之偶成
恩門小簡寫門生六載交情老弟兄一念吹毛牙角訟

十年握手肺肝傾，酌貪誰飲南濡水。敵怨人譚北府兵。

空券更憐蠅筆誤，却因誤處得分明。

正倫向在京口，每折簡必以恩門見。

稱予為漕時嘗舉之。

至鄂期年以饒事不給於詩，己亥夏五廿有八。

日始解維，雪錦夜宿興唐寺，繁星滿天，四鼓遂。

行。日初上，已抵潯黃洲，幾百里矣。午後南風薄。

岸舟屹不能移，延緣葭葦間，至莫不得去，始作。

紀事十解呈舊幙諸公。

雲錦亭前水接天，晚波如縠放歸船。
新詩開務從今日，此是江行第一篇。

離歌已盡沙頭玉，夕照初翻浪底金。
自是晴鷗無六月，半江雪片湧波心。

蕭蕭衰髮倚西風，兩岸青山盡識儂。
東去西來緣底事，祇應添得一龍鍾。

一江漲碧碧於藍，健舫鳴鳶舳舻正銜纜。
似過都空萬馬，又驚倚岸閱千帆。

宵聲傳柝重城閉曉漏迷鐘古寺荒仰看繁星垂四野
不知身世變炎涼

一餅一錫一團蒲到得今年一物無桑下勿興三宿念
古人不食武昌魚

葭葦延緣舞翠旌白頭吹浪又相迎攀轅亦作留行計
莫道馮夷不世情

昌黎久願列三王我亦曾親翰墨香惜別依依重回首
棠磯風月更思量

赤壁江頭白羽揮
鰕肥西塞酒同攜
歸期應在初絃月
家住康山西復西

人生解后適相懽
一曲高歌行路難
頻寄詩筒君勿厭
種花持釣是閑官

夜過壽昌

風雲八字護城隅
樓殿崔嵬想帝居
曾侍金輿惟石馬
幸因玉璽記銅魚
千年鼓角聲猶壯
四塞河山恨未祛
麋鹿已遊人事改
何人曾讀輔吳書

望樊口懷陶士行

昔年老子恨婆婆未付其如印傳何吳苑關心春日少
湘江回首暮雲多可無司馬親封鑰自是將軍老枕戈
我亦新來了官事正輸一舸弄煙波

三江口過舟時方四鼓

擢鷁收金柅釵蟲綴玉缸地鄰今七澤名襲古三江岷
漾雖分派荆楊却異邦晨光猶未發蚤認白鷗雙

寄王料院

釋

炯炯青燈對擁爐
掣鈴夜半讀邊書
風煙解使寸心折
霜雪頓侵雙鬢疎
已事勿言穿塞馬
歷官可歎上竿魚
勤勞似此天應報
我自鉏犂一任渠

一葉扁舟興浩茫
筆牀茶竈舊因緣
帆歸西塞秋風外
人在南樓夜月前
情不自由君憶我
老無所用我知天
何時見易園中路
拂石攜壺同醉眠

初還故居

元是廬山莫逆交
宮亭西畔著衡茅
盟鷗似怯經新浪

怨鶴還知宿故巢一沼種蓮衣可製萬竿脫擇杖輕敲
不須海若猶狀笑乞與杯堂樂芥坳

集喜二首

鵲噪庭前木蛛翻檐畔圍雙蓮瑞明月萬柳舞晴暉宿
鶴迎風袂盟鷗認雪衣物情同一喜應為主人歸

水面開新皺山容散宿顰松巢援已識花徑鹿初馴雲
倦隨歸鳥風清似故人逢迎真不暇誰作近前賔

病中有感四首

欹枕目雙炯觸屏腸九回玉蟲迷眩霧銀鹿伴飢雷消
夢雖驚隔丹心未粹灰青萍聊把玩塵匣為誰開
一載為官憂文書每壓頭枕鈴常警夜築甬更驚秋倦
豈因心至閑常與病謀息肩僅旬耳二豎欲何求
秋近夜初長開窗病骨涼心驚嫠婦歎肘繫越人方
張風侵几窺檐月在牀呼僮然粥鼎我欲待晨光
積病漸成衰情知老見欺眊昏先掩卷肩竦不關詩行
圃須人助登樓怯步遲經年蚤知倦況復隔年時

太行道

太行羊腸坂九折雲黑風乾尺深雪堇泥道滑木葉寒
轆轤車聲行復歇華山有馬久脫轆歸來牧野經幾年
一從倉箱事居積聊以知道煩長鞭前車已覆覆道左
天井關頭夜明火後車趣駕開井陘唱籌仍復催連營
關山青草春二月單軌一冬曾結轍髭顏毛落雙膊高
引領皮穿眼流血去年搏手雙拳空今年三月甬道同
可憐駑力不敢惜轆下亦覺鹽車通君恩天大示弗服

北野已甘偕散，感恩伏檻，飽秣猶為太行憂。後車

長門怨

驚風不成雨，行雲去無蹤。妾生三十年，著籍長門宮。
宮車轆轤春雷曉，明星初熒綠雲擾。增成丙舍爭迎鑾，惟
有長門閉花鳥。黃門開玉匙，畫史圖蛾眉。金鋪振瓊鑰，
玉秀生銅池。朝陽纔回金屋在，轉眄不堪人事改。入宮
已作鄭裒號，出塞那知延壽賣。花殘鳥語頻，長門春復
春。花鳥易驚老，況復門內人。東風動地夜來惡，萬翠千

紅繞簾幙當熊自有匪石心
甯顧班姬秋扇薄長門勿
輕怨視此篋中扇白華兮綠衣自古兮有之

病中散步四絕

一年無病緣官事一病兼旬為燕居
自是素餐天所厭可能豎子解乘除

朝隨粥鼎蟬復潤夜掩書帷鰥目眠
無奈暑威侵病骨起來搔首斗垂天

平頭奴子初茸鹿利口嗇天雙部蛙
二物何關人靜躁

不妨臥聽步隨車

絕憐倦翼晚風高
解紕歸來得故巢
物態隨人也歡喜
遊絲不住舞蠨蛸

荷花盛開以病旬餘不至亭上隅成二唐律

病襟慵策杖天鏡恰開奩
青葢迷前浦紅妝閒曲檻
藻窺知鷺下萍破識魚潛
會看吳公陣官蛙奏曉嚴

好在中孚澤猶橫未濟舟
擲金隨柳舞跳玉趁蓮謳
埽榻方思士鉤簾也覓侯
病夫均一笑此意本無求

予歸未省松楸將以初秋望前汎湖之龍門已
戒舟艦而連夕雨作不見月因賦天問二章

擬放平湖月下船擢歌中夕發長川蘋風好為雲開幕
蘭漿不妨人扣舷猿鶴候迎將曉日魚龍悲嘯未晴天
玉川塌額金沙上閭闔封詞謾一牋

小心風伯紫宮回眼看銀蟾海上來玄豹又成漫谷霧
斷虹猶作隱山雷便教雨積三時害未信晴無一日開
待試平生補天手為君明鏡再安臺

秋夜有感

蚤歲驪車擁漢關
憂心耿耿日凋顏
秋成正望狼烽急
夜枕不禁魚目鰥
三仕古猶關喜愠
萬金今不博安閑
回思此日一尊酒
只合長居木鴈閒

寄李微之祕監

棠湖浩蕩有盟鷗
塞上歸來賦葉舟
范蠡功名付西子
庾公風月自南樓
不虞繞指柔百鍊
已幸安心老一邱
從此書來訪生死
漢陽煙樹隔吳頭

送喬江州將漕江右

獵獵英聲世少雙
兩年鄉國望麾幢
才猷牛蔡硯初試
筆力龍文鼎獨扛
風節又新唐十道
恩波仍決禹三江
澄清何事先經濟
尚使尊賢志未降

昔日東州看陣圖
武昌陸續拜魚書
我歸舊齒邦人版
公去新乘使者車
但願世官居鼎鼐
從教野老自犁鉏
西風鴻鴈方遵渚
時有音塵接里廬

得陳元履家書六言四首

病骨經秋易怯人情比日多疎驚起打門軍將傳來置
驛家書

老病兩無世用謀謨百不如人喜見東牀論事誰言下
榻生塵

安問經時落落邊聲鎮日搖搖寄賀塞翁馬失決疑天
老龜焦

窺戶幾回鵲喜繞階一夜蒼吟痛飲政須似舊安居且
願如今

觀物四首

蚤

春蠶繰繭白如霜
機婦停機待天涼
井蚤一夜秋已至
寸絲千結縈柔腸
催租吏囂翁媪怒
裘葛未成心轉苦
篝燈促織永夜忙
悔殺比鄰日長語

蛙

鳴蛙恰恰地底鳴
池泉深徹池草青
秧田正枯須水活
龍骨車翻蛙不驚
在池固合憂涸鮒
鼓吹未妨明月步

可憐強聒將何為到底官私不關汝

蟬

亂蟬淒咽下復高逢秋輒作升木號老夫觸熱思靜臥
夕陽畏見聲嘈嘈客來畫冊誇莫二伐木驅蟬蟬不至
不辭來歲無繁陰正恐先為斧斤費

蚊

嗇夫利口工噬膚纖腰蔓尾不受驅不知一噤何所苦
拍拍攘攘歌且呼清晨出帷畫藏隙正是袪蒸炎暑日

但願涼風即目來且為蒼生膏血惜

閑居六詠

蚤起

五夜玉繩轉雙轡金井寒背人蚊作市欺夢蛩鳴官竹
徑風初度松梢月尚圓踞龜猶汗漫何許覓乘鸞

午睡

東日平明際北窗高臥時五經方坦腹百慮且伸眉蕉
覆從疑鹿槐安更獵龜覺來還一莞七椀玉川詩

晝閒

用闕無用地才與不才閒萬法因心起幾人如我閒牀
頭看黃卷屋外儘青山隱几適然笑何人戰觸蠻

晡飲

閒居欣少事燕坐覺無營炎暑鑒天陣驅除須酒兵勿
嫌晡日杲自有晚風清堪笑竹中飲終成七子名

晚步

抱病遊從少居閑醉醒頻心懷喜無事脚力尚隨人野

徑經行地園亭自在身不妨歸步晚長趁月華新

夜坐

一窗涼浸月四壁息聞雷銅漏水仍滴金爐香未灰徘徊聽蛩遠熠燿逐螢來看劒挑燈久譙城角引梅

賀高中書兼崇政殿說書

絃議通三府高名動四聰鳳池仍舊渥虎觀冊新功晝日槐方翠秋風棗已紅直須先抗議莫待入雲中

日月熙明地風雲際會辰紫宮瞻象逼丹宸喜情親遜

志賢謨在仔肩聖德新耕莘須負鼎從此學而臣

張孝顯晨訪懋忠堂因拉陳升可王困道同飲
徑醉臥小閣醒則晡矣戲呈諸公

凌晨有客來款門盥櫛下榻呼冠巾怪生鵲喜繞庭樹
迎客不但填河津清尊湛湛開北牖頤指市奴駿奔走
烹鮮煮餅羅朝槃首宿闌干豈無有一杯兩杯叱先驅
羣羊入夢撞甕道三杯四杯舌底滑闔坐牢辭輒投轄
共言卯飲夕不同能使終日長冬烘一朝便廢一日事

除却投牀百無技老夫笑倒絕冠纓人生無日無經營
經營至竟有底成謹閱此舌君勿評直須大噉五六七
不醉不扶母返室高眠一枕醉復醒莫管今朝更明日
吳季謙侍郎送家釀香泉絕無灰得未曾有戲

成報章

義豐愛酒憎官壺日長忍渴呼酪奴自言畏灰如畏虎
有酒不向官坊酤當家香泉世無比米潔麴甘醇且美
釀時不著一點灰滿酌寒泉挹清泚小槽滴瀝竹簷承

冰渠夜澣真珠明一泓澄澈玉無底滿甕盎盎春風生
醞成不肯飲俗客澆著柴桑舊時宅共此千年醉眠石
更將餘瀝走馬軍來注吾家老瓦盆許我自飲不許分
老境官遊環軌轍官酒徧嘗隨地別何曾見灰能作孽
飢來一腹大於蟬鯨喙自覺吸百川是灰是酒俱不辨
豈問他州并異縣今夕何夕翻露漿扣壺一洗灰土腸
君不見柴桑於酒特寓意相逢不擇賤與貴要是醇醪
均一致汝陽後來帝家子路逢麴車不知味流涎正復

何所謂貧為田舍富天宗過酒隨飲莫適從豈如仙家
居義豐無懷自與造化通彼燧人氏初何功酬君三語
將毋同同不同君信否黃花飄香石耐久明日山行且
攜酒

珊瑚

銅柯凝異質鐵網隊層淵海霧夜涵潤山霞朝欲然綠
鬟尚歌枕烏帽稱鳴鞭勿為毛錐子日興靡萬錢

無題

秋水芙蓉試蚤妝
半軒微雨灑鴛鴦
細腰正欠酬金餅
奮翼何堪卸玉梁
髮鬢釵橫人在牖
繩低斗轉月侵牀
無情花影雲來去
都做一天風露涼

餛飩頭

幾年太學飽諸儒
餘枝猶傳筍蕨廚
公子彭生紅縷肉
將軍鐵杖白蓮膚
芳馨政可資椒實
麤澤何妨比瓠壺
老去齒牙辜大嚼
流涎聊合憫饒奴

小墅桂花盛開與客醉樹下因賦二律

舊遊曾賦小山篇，浪蕊浮葩總遜妍。
金粟同瞻黃面老，玉枝爭擁碧霞仙。
化身瑞相已百億，匝地香風更大千。
無量現前金世界，倦翁又結醉中緣。

黃金湧出碧檀欒，消得充庭舞廣寒。
露蕊移將天上種，雲階借與月中看。
扶疎清影立黃鵠，匝滿庭翔翠鸞。
吹徹玉笙正涼透，香風萬斛夜漫漫。

雨中觀廬山

雨裏觀山負不同，何須九疊看屏風。
紫觚壇上排蒼壁，

青步障邊鋪翠茸
谷錦未迴晴日照
衣綃聊借澹煙籠
祇今萬木添紅纈
更倩青霜染曉楓

半生每負看山眼
此日真成帶雨遊
歌枕有無疑欲暮
成峯橫側總宜秋
耳喧似厭泉鳴咽
腰繫不妨雲去留
明日新晴馬蹄放
直須三峽看龍湫

約吳季謙山行書來問期戲答

連朝積雨快新晴
雨後青山眼倍明
大路岳蓮聊戲馬
西園池柳正啼鶯
已拚一醉從金諾
共聽層淵噴玉聲

月裏青山儘清絕可憐偏照國西營

觀芙蓉有感

芙蓉城邊觀芙蓉開時澹白薦深紅新晴著人過於酒
聊與老面回春風少年白面豈長好花落花開不知老
老來會有少年時對酒不飲將何為

邵伯溫聞見錄載范忠宣帥慶陽時總管种詒
無故訟於朝上遣御史按治詒停任公亦罷帥
至公為樞密副使詒尚停任復薦為永興軍路

鈴轄又薦知陞州公每自咎曰先人與种氏上
世有契義某不肖為其子孫所訟寧論事之曲
直哉予在山中讀書偶見此書而表之

君不見孔融昔日見李膺百世尚以通家稱又不見孔
融後來薦鴻豫卵翼方成比行路北海平生開酒尊未
應賓客皆若人儻令同德更比義華胄肯以遙遙論世
間麟鳳雜梟虺人事會逢總如此高平丞相本大賢尺
壁那容寸瑕指一朝契家青澗种轉頭不記龍圖公螭

鳴亂磬蠅點素丞相襟量滄溟同歸來端委廟堂上一
青不捐三世將自言曲直何必言愧死老奴作何樣吁
嗟此輩何代無高平堂堂真丈夫邵家聞見訂千古寂
寞澗城墳上土

趙季茂通判惠走筆奉和

病嬾兩相宜閒吟九日詩江山雖舊隱泉石是新知不
分黃花老從教烏帽吹白衣渾未至醒眼欲何為
山行事事宜酒興富於詩雲錦工何用風帘酒聖知囊

空須共賦笛好愛孤吹斟酌蒼茫詠憑高漫爾為
晴佳雨亦宜雲黑又催詩靜處景俱勝閑中趣自知攀
條隨客嗅卷葉看兒吹世事只如此吾今何所為

天巧與天宜雕鏤馬用詩冥鴻吾自愛隱豹彼何知牧
笛方堪聽胡笳不奈吹傷時燭之老老矣不能為

己亥八月廿一日除書予拜太平興國宮祠官

呈趙季茂

世間何物最是閒司諫拂衣歸華山倦來忘記省不得

依約此語祥符間終南捷徑本自錯老子新司紫元鑰
官家雇我作閑人有酒醉呼端不惡歲縻廩粟月俸錢
鰲鶴有料芝有田人生何必待有用我老得此寧非天
君不見當年把臂龍圖上司諫放歸元未放又不見倦
翁山行醉復醒說著拂衣今亦忘

奉寄何正父總幹

經旬習嬾慣山居不寫城間一字書把菊見山新趣倦
汎蓮依水舊交疎無心是處友麋鹿有客寄誰烹鯉魚

見說近來軍食足不妨詩卷訪犁鉏

山中奉寄通判楊宗博

多病山中客無人傷酒罇與援分椽子為鹿長禾孫白
晝雲歸屋黃昏雨打門忽懷楊司馬烟靄隔重關

九月十三日始就郊墅拜寶謨閣直學士提舉
江州太平興國宮之命

槐影西清舞翠鸞竹宮高接五雲環職陪溫洛圖書地
名在元封卜祝閒晝訪未承龍閣問晨香猶廁羽衣班

祠官到處無公事且聽松聲老此山

茶花盛放滿山

花容鎮粟露冰膚消得脂韋酪作奴葉底綻葩黃映玉
枝閒著子碧垂珠潔躬澹薄隱君子苦口森嚴大丈夫
便合味言歸雋永移根禁蘂比青蒲

九月十四日夜月明如晝敬想合宮竣事志喜
而作

纖塵不動月流空雲繞昆侖想合宮蟬冕侍祠三事列

雞竿賜赦九州同
裁儀丙己尊容典
肇祀庚寅識聖功
田野老臣察天意
夜深頻起候西風

將遊太平宮小詩呈趙季茂

聖治峯前松檜寒
舊遊重此解歸鞍
著身泉石無心客
主掌雲山正額官
老去隱居居紫府
新來雜壓壓黃冠
門東曾有劉仙洞
剝蘚攜筇試扣看

螃蟹

無腸公子郭索君
橫行湖海劒戟羣
紫髯綠殼琥珀髓

以不負腹誇將軍酒船拍浮老子慣咀嚼兩螯仍把玩
廬山對此眼倍青願從公子醉復醒

聞畫眉鳥聲戲作

木杪幽禽巧語新何時曾記得名因樣傳京兆成雙嫵
人指漁陽開小顰儘稱如簧啼白晝未須對鏡學青春
山中有叟嗒無語短褐龐眉更笑人

小春六花

綠萼梅

晚秋過了小春催放盡山家綠萼梅東閣渠闌詩興動
南枝先放暖風回素裳肌透未融雪碧蒼色欺初暈苔
惆悵東籬正岑寂重陽消得滿園開

茶花

萬峯落葉木槎牙春色初回壟上茶淺蕊黃金韻
嫩容白玉沁梨花西風凝露纔成顆北苑喊雷應未芽
苦口味言終有益莫將容悅比浮葩

芙蓉

人道秋來不似春芙蓉特地張吾軍紅妝綠水照清夜
綵仗青旂朝大昕吳陣綺羅千隊擁秦川錦繡五花羣
可憐倚袖清霜蚤日薄雲輕醉未醺

小桃

霜晴著物利於刀漏洩陽和是小桃春色曾看九重醉
秋風不管十分饗青枝似慙烏棲月紅浪不翻龍化濤
穠豔自同時節異夫君於此覓清高

黃菊

花時已是過重陽翠幹重開滿地黃不為晨暉借顏色
要將晚節看芬芳宅邊豈必白衣至甕裏不妨紅友香
喚起閑情老元亮頽狀一醉答秋光

李花

一枝眼底物華新翠袖清霜更可人靚色不須誇縞夜
韶容聊復返青春日烘有意姿仍潔露洗無言態更真
不趁繁華更孤迥為君喚起雪精神

太平宮遇雨

山居五旬晴山行一日雨太平咫尺間千里隔跬步黃泥深三尺風聲更號怒誰語逋客知山靈儻留汝

以廬山所產天花草冬筍玉延饌趙季茂通判

已認山家作當家與援分栗雀分茶氣先十月地抽筍
光現五臺天雨花幸有玉延炊夜月官令繡谷照朝霞
憑君試雋山中味却較閑忙定不差

天花草出五臺山俗傳文殊來現光

相所及即生今廬山或有之而極難值天池亦文殊之居也

葆清值雨

松竹鎖靈宅塵埃了不侵
洞龍隨劒吹檻鶴識琴心
路指三峯近山通一徑深
壁間少年字陳跡不堪尋

十一月十五日忽苦舌瘍甚不能飲食憊臥一榻戲成

君不見東坡昔步虎溪月
夜聽溪聲廣長舌溪聲不斷
流不枯此段磊落真大夫
一生吾伊換喑鳴嗟哉三寸
予豈無公子搢紳陳禮法
枕麴無思噤如蛤辯士說客
譚從橫叱牛惟解供力耕
爾來更自作奇痛晝苦吟呻

夜妨夢伏牀啜粥猶漓浪鬻肉持將堪底用太倉受禾
三百塵大官烹羊俱鼎羶瀛洲給膳稱學士飽食端居
今六年生平元不負此舌欲辦一奇了無說更憎此舌
工負予乃復累我七尺驅鴟夷槓載鷗鷁杓向口低眉
輒前却齒牙助桀復搖落誤殺流涎孤快嚼仰天大笑
絕冠纓舌兮腹兮誰重輕

宿溪聲閣望香爐峯偶成二律

閒歷煙巖古琮琤雪澗橫海潮秋八月山雨夜三更宵

作隨流想難忘漱石情壯懷徒激烈聊復以詩鳴

廬峯三萬丈鳥道度嶙峋宿雨留前躅清風絕後塵誰
憐石樓客同是玉階人謝屐須乘興千年草木春

謝趙季茂海錯二律

珍殽惟錯遠持將賴有詩情合得嘗明月擘蚶分瓦礫
晴霞浴鱉露珠房鮑烏鰖白螺開靨鉅紫鰕紅鰓挾腸
鴈斷關山歸未得把杯猶憶少年場

首盤朝日照蓬蒿消得長吟賦老饕喜見監州有螃蟹

未須學士議車螯
素鮓三九漫青韭
斗酒十千無白醪
應為近來詩思少
故將飲興發風騷

己亥十二月十七日堂帖被召感恩二首

九天驛騎下弓招
葵日丹心識就堯
鸞鳳正應在阿閣
鷄鵠何事享簫韶
邱園有分容逋客
海嶽無裨愧聖朝
老病不堪心力倦
甫田勿歎莠蕎蕎

歸來三徑脫塵鞿
兩拜除書下玉墀
聖澤雲天何以報
臣心鐵石未全衰
馬蹏已負驅車願
鴻羽難勝漸陸儀

願把一犁祝膏澤康衢擊壤樂清時

香羸

金箱玉質介為裳一騎紅塵自遠方
籍挂衆香椒桂國身居大海水雲鄉
丁羸薦醢體猶具甲煎流芬名未亡
舉酒便應醅一醉尊前風味試平章

病中未能訪鄧德載督參大監戲贈二首

昨朝華宴想清歡今日牀頭未整冠
已恨酒腸孤夜醉更驚病骨怯春寒
多情條脫參差是一抹琵琶錯雜彈

老眼眇昏正無緒
爐薌燼冷對蒲團

老來病是惡因緣
白晝明窗思悄然
欲住又傾連夕雨
半醒似醉困人天
近拈吟筆塵欺硯
遠想江樓浪拍船
滿院杏花紅欲放
何時長笛醉風前

春晴將遊玉淵
踐吳季謙待制
馮可久武博山
行之約先走長句

康廬三萬丈下有神龍淵
旁聯玉井並仰溯銀河連層
厓積冰雪斷岸藏風煙
崔隤五老岸迸瀉三峽泉
鯨鯢

碎紫霧蟠螭開青天脈疑海眼近寒入山骨堅澗草搖
秋暉谷花發春妍其閒地布金到處題標璇大哉象教
尊儼若螺髻仙巍巍南宗柏湛湛西方蓮總持包萬法
卓犖棲羣賢慈心鬼神仰顯跡今古傳遠令千聖境容
此一席願我昔宿命通曾結它生緣嘗聞祖師隱上應
帝釋躔清宵珠石隕白浪星湖邊至今澎湃中常欲光
景然當時初卓錫如昔晚采椽浮雲常抗志立雪恩比
肩壯懷凌九疊浩氣湧百川山水為高深志節爭後先

永言紫俗累茲遊經幾年猶想謝公屐同整劉琨鞭橋
梁識昨經歲月驚舊鷄盍簪有耆碩授館許款延牛耳
盟屢寒馬頭月方圓便思供糗餐更擬焚蘭茝先尋遺
民盟次迹繡佛禪策杖挂錢去拂石看山眠歸來廬山
南三士同陶狀

奉賡趙李茂雪中感興

曉雪初明瓦春雲密布空酒驚蕃鶴遠詩坐灞驢窮訪
戴無嘉客和陶稱倦翁應憐四十韻衣帶賀年豐

病中午後登山閒步遙見園亭有翠帟張欄處
久而識之為張孝顯成趣軒蓋與緹屏油幙高
會予病不得衝宴悵惘移時因以中孚澤所網
鮮鰯脩以棠漪家醞併成四絕呈在席諸人

九折登山倚瘳筇杏蹊眼禰蚤冬烘翠雲遮斷仙客
不許其閒著倦翁

蒲山桃李開紅霞曾約香山白鹿車堪笑東風欺病客
僂先且到別人家

小池玉尺躍清波病不開尊奈爾何更倩棠漪吹柳岸
為君小發醉顏酡

衝席丞郎酒斛籌不闕無面見春鷗五鯖見說妨齋禁
留待明朝太白浮

戲作呈趙通判胡教授張總幹

人言春遊無不好一日宴客三日飽翁言此語特未定
一日宴客三日病人生所願筋力強問花訪柳同壺觴
老夫豈無少年狂胡為兀兀坐一牀憶昔少時事賓友

常有清尊湛東牖稍長便不論升斗纔對白衣輒搔首
東來三輔西陪京二十四橋誇廣陵萬椽紅蠟槌畫鼓
醒處傳杯醉中舞何嘗一日不春風酒光花豔詩興濃
兔肩鹿脰坐據熊急雪打面看雕弓笑譚千古一呷中
眼底頓覺四海空可憐芳草長邊路年少堂堂背人去
歡筵陡廢管與絃粥鼎相隨朝復暮塞砧街鼓總愁聽
涼月花宵等虛度前旬作意趁萬紅沈霙積雨仍多風
中間一日稍晴意藥裏關心復思睡無羶坐上老相如

昔時依幕今題輿三君笑譚忽與俱使我捨策忘其軀
須臾把酒舌底滑席地幕天醉鄉闊明朝奇祟那可言
閉院重尋舊生活回思北海酒不空料應多病過於儂
坐客常滿更可疑華佗已死將誰醫

睡起三絕

睡起東窗日已紅扶頭宿酒未惺鬆南陽一夢何闕醉
自愛終身作臥龍

天色今晨已放晴烏鳥亦覺有歡聲幅巾自是便疎嬾

飯了花間取次行

五更輟轉待晨光到曉曹騰入睡鄉却是金門蚤朝客
千金不博枕中方

予園泰堂之旁有奇石小有洞箭括有門車
箱有谷高廣雖不袤丈而嵌空之勢宛若飄動
暇日獨坐對玩移晷因賦

池邊歷平蹊果下動遊韉一笑未必領萬象徒目送淵
渟歷危檻目景眩華棟閑情晦不舒倦思悄如曹忽驚

鵲噪檐恍類雞發甕坐開蒼玉壁平揖青瑤峒疇昔果
安在奔走比嶽貢仰觀箭括門廣宇豁晴霽右開車箭
谷盤道陟微衍中天隱日月遙海插蟠螭居狀表文閒
有此具美衆老夫生平嗜酷好泉石弄天巧謝斲削人
為謾搏控尚憶三神遊倏紀十年夢踞龜曾食蛤騎鶴
更筇鳳覺來海山蒼倏見雪竇空便疑勢嶄峇獨欠波
瀕洞捧嬰喜對酌岸幘發孤諷此兄定絕奇吾意當折
衷一笑問阿章試與評伯仲

新荷出水

貼水初翻紫玉團，忽驚矗立傍闌干。
瑤池七日來青鳥，玉鑑孤奩舞翠鸞。
曉露走盤珠，顆瑩晚風颭。蓋雪衣寒，
從今十丈開花面。太華峯頭更一看。

排灣遇風對岸即彭澤舊縣二首

隱約山藏霧，砰礧地起雷。
黑風吹海立，白雨過江來。
齊樂正應爾，沛兒安在哉。
雄雌誰與辨，試上楚王臺。

岸上蘆搖首，門前柳折腰。
千年已陳迹，四海又驚飈。
宿

翳何當淨高風幸未遙柴桑那可見身世且漂搖

便風經鴈汭宿荻港是日舟行四百里三首

近岸千帆閱雄襟一昔舒雲程排沸浪風御翼澄虛塊
歷過都馬波翻縱壑魚經旬歎淹滯此理盍乘除

羊角搏扶日鴻毛返順時天心應有為吾道復何疑岸
燎開戎捷礮神助好詞倚檣聊一笑且試楚襟披

瞬息四百里經行三十年此時真縮地當日信梯天岸
過人回首山浮浪駕肩望塵何足羨禦寇正冷狀

入蕪湖港過古祥寺

昔時曾訪後山松
天道那令霸業窮
夾岸人觀新太守
擁門僧認舊詩翁
隱磯謾指六朝事
魯港嘗淹五宿風
從此片帆湖際去
只應日在瑞雲東

東壩以裏沿岸人家
皆對門植葦於小嶼
不曉其旨謾成四絕

岸旁幾曲住人家
淺嶼排門種荻花
縱使秋聲常索索
斷無司馬聽琵琶

萬里江濱長野蘆西風元不費工夫兩京薺菜論斤賣
耳目由來喜所無

北都舊產無淇竹見說園池蘆葦多漲綠不妨夜來雨
更須別浦聽鳴荷

曲江四畔鎖離宮細柳新蒲日日風想見千門映春綠
君王未見碧成叢

三塔寺寒光亭張于湖書詞寺柱吳毅夫命名
後軒

竹裏逢僧院殘碑不記年鴈題三宰堵龍化兩魁躋寶
正號應紀元豐墨尚鮮寒光定何似誰放五湖船

渰中水淺輿從下水肩舟

水面平如砥湖心淺不波駕肩同作揖袖手莫譚河不
見成橋鵲空傳度磧駝勞生正應爾空愧白鷗莎

嘉定丁卯予守攜李召還郡人見餞於三塔灣
偶至此寺因名有感

往年曾佩雙湖組古刹猶題三塔灣墮鴈重尋湖浩渺

斷虹渾記水回環兩州隔涉名無改二紀棲遲老復還
病衲雖無分別想經行莫作少年看

去歲五月二十八日發雪錦亭以六月旦謁富
池而行是夜始望見廬山今歲以此日正在湖
渾中念歲月之倏忽驚道途之勞勩回首感歎

二首

雪錦亭前夕照紅興唐寺下曉聞鐘傷心楚水又經歲
回首吳雪知幾重萬里同盟祇鷗鷺三江嘯浪憶魚龍

如今且對湖光裏八九重開夢澤胸

去年今日富池頭浩蕩風煙卷雪樓湖海百年雙鬢老
荆揚兩地一萍浮河斜左界流清夜雲密西郊望有秋
通塞隨時何必問明朝又放溧陽舟

病虎

長風吹谷白日暗曠野人稀雲黯澹狐狸嘯舞豺狼嗥
病虎妥尾行蓬蒿天寒泉凍山骨高皮枯髀痒霜爪搔
紛紛晴雪脫落毛垂頭帖耳身腥臊羣鴉槎牙噪古木

燐火半青新鬼哭走麕過前不能逐目視耽耽蹲撲楸
毛風血雨天地肅何日跳踉看食肉天生萬物有盛時
當年一嘯天助威坐看雲起行引兒當塗寧復論老羆
一朝老去守巖竇落葉滿山冰雪後壯心空在筋力疲
寂寞長飢眠白晝古來豪傑多沈淪不用為鼠皆若人
范睢折脅西入秦內史長歎田甲賔可憐百獸為披靡
轉顧不如圜中豕男兒奮踏亦渠似甯復虛為倚崖死
君不見南山白額曾報恩牆頭金枕投何人

玉唾壺

古來玉唾壺歌罷壺為缺憂時一片心常惜志士烈鷗
鵝瑩出昆吾刀截肪溫潤如切膏悲歌聲動行雲高何
愛一闕稱世豪馬生驥州北未省能伏櫪骨拳髯秃利
四蹄鳳膺赭汗人不知夕陽芳草顧影嘶猶憶振鬣天
山西可憐歲華暮萬里瑤池路鹽車轆轤踰太行夜然
枯草晝服箱上天振策無王良徒有此志今未忘荆山
韞明月良工斲不徹抱璞昔三刖曾泣卞和血既斲復

毀不可磨尊前對酒聽浩歌唾壺雖缺璞更多騏驥不生奈老何

泥行終日至晡始抵中橋

歷盡清灣日已晡斷虹吹浪過平湖兒癡不識中橋影
問道前山有雨無

到得中橋一徑斜岸傍沽酒兩三家長年醉臥桑陰下
鼓吹猶煩兩岸蛙

夜宿橋岸

裹纜宿前灣平蕪決滌閒舫移星在戶岸迴斗藏山淺
瀨不勝揭浮生何日閑夜深聞過舫知自溧陽還

問道宜興二首

買田陽羨說東坡想見溪山勝槩多曾是中營誇繡帽
尚傳遺廟鎖雕戈斬蛟義槩人猶記化蝠仙蹤事易謠
我欲問津先訪古古靈題蹟試摩挲

宜興張公洞洞刻古靈題跡客有為

予言古靈後乃仙
去者末句故云

粹儀夾綻盛花鈿人說先朝祀玉仙
卷畫有溪春不老

煉丹無竈古空傳，乞靈賸擬羞蘋藻。養性何勞學永鉛，
書閣蒼龍應不遠。為君重寫白雲篇。
地
天申宮夾紵玉仙聖母章聖禱嗣之

過順州

身世漂搖似轉蓬，歷湖經滄任西東。凌波小試檣松櫂，
宿露飽親葭葦叢。兩岸居然驚脫兔，一帆從此迅冥鴻。
到頭天意君須會，吾道區區端未窮。

寄江州趙倅季茂時過溧陽舟中正順風張帆

庾公樓上恁欄時一片歸雲費夢思鄉國情懷應念我
江山風月定分誰青衫休為墓陵溼紫氣先尋牛渚期
好是初秋鵝花候蛾眉尊酒正相宜

寄高建寧尚書

已分耕畦老一犁天風吹夢入枯溪誰憐北垞騎牛背
又踏東華放馬蹏槐綠不妨穿禁漏棗紅便覺動邊顰
歸塗願請平戎策恐曹裝趁詔泥

張公洞二首

祚紀千齡運名標二代仙鵲鳴應徙地蝠化已先天風
洞疑無底丹爐信有緣祇應巖下奕為我一楚狀
驢跡驚初踐鷹盤若有靈石橋通便戶金鑰鎖硃庭滴
乳看成像登臺仍刻銘更憐國山字真欲比云亭

望北關門

萬里雲開瑞日明雕甍遙接九重城觚連丹鳳紅雲繞
關度青牛紫氣迎新第千門俱改觀舊溪二紀謾關情
今宵且向橋頭宿又聽簌簌打六更

水樂洞

天下水樂洞今歸四姓家
臺池閒日月泉石痼烟霞
誰挈遊人棹還尋奉使查
明朝重回首清夢隔京華

趙山二絕

驅車結束趁晨暾
水樂簾前共一尊
二十二年如掣電
軟紅依舊暗脩門

江南閑殺老尚書
自是承平一事無
送客折腰書脫腕
試從駝獸看登塗

洞霄宮

宮堯樓觀鎖新宮十里清溪一徑松金榜奎章紅日照
石厓仙影白雲封香殘半掩凝塵榻路轉猶聞隔澗鐘
四牡經行真不枉玉淵初識洞霄龍

洞霄宮良泓孫副官房

山比復泓澄幽房取次行萬峯隨眼換一勺照心清墜
露涵秋氣斜暉度晚晴迥然還自笑見易未經名

九月八日桐川道中二絕

斷雲輕素抹山腰山下人家野水橋小隊旌旗空獵獵
不教閑趁酒旗招

依稀九日明朝是三徑情知不到家隨分秋光關節物
桐川道上看黃花

九日發廣德至建平感事有作

西風吹著白髭鬚嘉節催儂老道塗無菊傍籬真漫與
有松埽徑故應蕪登龍路近心誰賞戲馬臺成足已瘡
悵望杜陵正搔首一枝不得賜茱萸

夢尚留三橋旅邸


天上歸來打六更夢回搔首正膏騰玉霜初上三更月
絳綵猶明九市燈聲徹銅魚催勘箭影斜金鵲在觚稜
帝鄉東望重回首佳氣何時到五陵

碧雲亭晚眺二首

閑步碧雲亭寒郊弄晚晴牛羊分暝色禽鳥有春聲城
柳風猶勁溪梅冰共清屋梁正殘照西望憶長庚

歲華冉冉耕畝自閑閑日落青楓浦雲平白苧山夜

城巖警柝昏鼓動層闌風露汀洲冷驚鴻自往還



宋百家詩存卷二十四